

C.M. Kaho‘okahi Kanuha  
[kahookahi@gmail.com](mailto:kahookahi@gmail.com)

BOARD OF LAND AND NATURAL RESOURCES  
FOR THE STATE OF HAWAI‘I

IN THE MATTER OF ) Case No. BLNR-CC-16-002  
)  
A Contested Case Hearing Re Conservation;) )  
Use Application (CDUA) HA-3568 For the ) **KA ‘ŌLELO HO‘OKAHUA O KA**  
Thirty Meter Telescope at the Mauna Kea ) **HO‘OKOLOKOLO KŪ‘Ē HIIHA**  
Science Reserve, Ka‘ohe Mauka, Hamakua, )  
Hawai‘i TMK(3)4-4-015:009 )  
) **CERTIFICATE OF SERVICE**  
)  
\_\_\_\_\_)

**KA ‘ŌLELO HO‘OKAHUA O KA HO‘OKOLOKOLO KŪ‘Ē HIIHA**

**I. KA HO‘OLAUNA**

‘O wau ‘o C. M. Kaho‘okahi Kanuha. He keiki papa wau o ka mokupuni nei ‘o Hawai‘i, ke keiki makahiapo a Papa lāua o Wākea. He Kanaka kēia a he Hawai‘i Pono‘ī nō ho‘i. He mamo nō ho‘i wau no ka po‘e nāna i kau ma ka wa‘a a holo maila mai Kahiki mai, he pulapula wau no ke ali‘i nāna i noho ka Mauna a Wākea, he pua wau no ka po‘e nāna i hele i ke kaua no Ka Na‘i Aupuni a he mo‘opuna kēia no nā kānaka nāna i pūlima i ka Palapala Ho‘opi‘i Kū‘ē Ho‘ohui ‘Āina iā ‘Amelika. Ua kula ‘ia wau ma ka ‘ōlelo makuahine o kēia ‘āina mai ko‘u wā keiki mai a ua a‘o ‘ia mai wau no ka mo‘olelo o ko‘u ‘āina aloha. Ua a‘o wau i nā mele a me nā oli o ko‘u mau kūpuna. ‘Ike wau no nā hana o ko‘u mau kūpuna. ‘Ike wau i ka ‘oia‘i‘o, a ‘o ka ‘oia‘i‘o, ‘a‘ole ho‘i i hiki ke ho‘opoina ‘ia. No laila, ma loko nō o ka loa‘a ‘ole ‘ana o ka mana ho‘okolokolo ho‘opi‘i i kēia ‘Aha Ho‘okolokolo Kū‘ē Hihia o ka Moku‘āina Noho Hewa o Hawai‘i, a me kona luna, eia nō wau, ‘o Kaho‘okahi Kanuha, e komo ana i kēia ho‘okolokolo ‘ana no ka

pono o ka ‘āina a no ka pono o ka lāhui. Ke hō‘ike aku nei wau me ka ‘oia‘i‘o, ke kū‘ē loa aku nei kēia i ka ho‘ohaumia ‘ana i ka mauna la‘a kapu a Wākea no ke kūkulu ‘ia a‘ela o ka ‘ohe nānā nui ‘o TMT.

## II. NĀ NĪNAU

Ua hō‘ike maila ka luna o kēia ho‘okolokolo ‘ana ma ka “*Minute Order 21*” iā kākou i nā nīnau nui ‘ekolu e pane aku ai. E pane aku ana wau me ka “‘A‘ole” i kāna mau nīnau a pau a e ‘imi ana wau i ka hō‘ike moakāka ‘ana i ka‘u mau kumu ma o ko‘u hō‘ike pa‘a ‘ana a pēlā pū ma nā hō‘ike a ka‘u po‘e hō‘ike pa‘a.

## III. KA PANINA

Ua hewa mua ka Moku‘āina Noho Hewa o Hawai‘i i ka ‘ae ‘ana aku i ke kūkulu ‘ia o ka TMT a inā nō e ‘ae hou ‘ia aku ke kūkulu ‘ana i ka ‘ohe nānā e ‘oi aku ana hewa ma luna o ia moku‘āina noho hewa. Ina nō e ho‘okō ana kākou i ka ‘ōlelo kaulana o ka Mō‘ī ‘o Kauikeaouli e ho‘ohana ‘ia nei e ka Moku‘āina Noho Hewa o Hawai‘i, ‘oia ho‘i ‘o “Ua mau ke ea o ka ‘āina i ka pono”, ‘a‘ole kākou e ‘ae aku i ke kūkulu ‘ia o ka TMT. Hōlualoa, Kona Kai ‘Opua, Hawai‘i. 23 ‘Okakopa 2016.

---

C.M. Kaho‘okahi Kanuha